

OFICIS CONFERITS A PERE JORDÁ

CAVALLER, DOCTOR EN ARTS Y EN MEDICINA

(1455)

a.— *Ofici de Frothomèdich y examinador dels metges.*

Noverint universi quod die veneris secunda mensis julii anno a nativitate Domini millesimo CCCC.^o quinquagesimo sexto, existente nobili et magnifico viro domino Francisco de Erillo, milite, majordomo et consiliario regio ac locumtenente generali serenissimi domini nostri Aragonum Regis in presenti Regno Majoricarum et insulis Minorice et Evice, intus carcerem regium presentis civitatis Majoricarum et ibidem audientiam palam et publice ut in diebus veneris solitum est tenente et celebrante, venit et comparuit coram dicto domino locumtenente eximius et honorabilis vir dominus Petrus Jorda miles, artium et medicine doctor, et presentavit dicto domino locumtenenti, et per me Georgium Bagoni notarium et scribam curie gubernationis Majoricarum, eidem legi et intimari requisivit et fecit, duo privilegia seu cartas pergameneas dicti serenissimi domini Regis, cum earum regiis sigillis impendentis munitas, una cum duabus executoriis litteris ejusdem domini Regis, quarum omnium tenores sequuntur sub hiis verbis.

Alfonsus Dei gratia Rex Aragonum, Sicilie citra et ultra Farum, Valentie, Hierusalem, Hungarie, Majoricarum, Sardinie et Corcice, Comes Barchinone, Dux Athenarum et Neopatrie, ac etiam Comes Rossilionis et Ceritanie, dilecto consiliario et fisico nostro Petro Jorda militi, artium et medicine doctori precipuo, salutem et dilectionem. Perutilissimum nobis fore videtur personas ydoneas perquiri et eligi debere cum officiorum concessionem illorumque exercitium, si ipsa presertim officia talia sint que non solum utilitatem rei publice concernere videantur verum etiam circa ea salus hominum versetur. Considerantes itaque quod in regno nostro Majoricarum ejusque pertinentiis atque insulis ei adjacentibus Minorice et Evice, ob defectum Prothomedici sive ad infrascripta potestatem habentis, non nulla et quidem propter inscientiam seu impericiam exercere volentium artem atque res inferius designatas, inconveniencia et dampna plurima assequuntur, non sine magno periculo vite egrotantium et rei publice detrimento. Decrevimus

igitur ea re atque periculo de aliquo optimo prothomedico providere, que unumquemque ad praticam artis medicine absque matura sui precedenti examinatione accedere non permitat. Et tanto ad id maxime flectimur providendum quanto cernimus majora pericula et irreparabilia in sanandi officio evenire; equidem ad nostram in dies pervenit noticiam quod si imperiti apothecarii, barbitonsores, obstetrices, alieque mulieres, nec non plurimi ignorantes medicine exercitium, absque ullo examine peritorum in ipsa medicine arte, illud attentare et exercere presumunt. Nec non aromatarii atque chirurgici sub ipsius apothecarie et chirurgie examine manus amplificanti metas eorum examinis transiendo, sicque incongruas tradunt medicinas, unde magne hominum strages sequitur ac sevisissima et diuturna calamitas, ex qua multociens incurabiles fiunt egritudines et interficiendi corpora potius quam sanandi pululant effectus. Revolventes igitur in mente nostra cui predictum prothomedici officium comitteremus, nam quod magnum quidem est exactam exigit diligenciam, ex quo de vita hominum utique certatur, atque ideo in eo comitendo cautius et maturius agendum est. Tandem hiis et aliis per nos profecto discussis atque digestis, vos dictum medicum nostrum Petrum Jorda, cujus scienciam, sapienciam, mores et in hujusmodi medicinalis scientia theoreticam et praticam in persona nostra experti sumus, adeo non solum hoc munere verum etiam ampliori dignum et benemeritum reputamus. In aliqualem igitur premium et remunerationem vestrorum in nos obsequiorum liberali animo prestitorum, ubique pericia vestra uberiores in ipso regno nostro rei publice afferat fructum, tenore presentium, scienter, deliberate atque consulte, vobis eidem Petro Jorda dictum officium prothomedici in dicto regno Majoricarum, ipsiusque pertinentiis atque insulis ei adjacentibus ut predictur, cum salariis, prerogativis, jurisdictionibus, potestatibus, preheminentiis, emolumentis, lucris et juribus debitis et consuetis atque ad ipsum officium debite pertinentibus et spectantibus, cum quibus aliis similes prothomedici in aliis nostris regnis constituti tenuerunt, rexerunt et exercent, tenent, regunt et exercent, toto tempore vite vestre, recepto prius a vobis de ejusmodi officio fideliter exercendo debito ad sancta Dei evangelia juramento, concedimus penitus et fiducialiter comittimus et comendamus, ita quod deinceps vita vestra ut prefertur durante